

正定府志卷之四十五

藝文二記

記上

元氏白石神君祠記

漢失名

平泉莊記

唐李德裕

韓府君墓記

宋韓琦

藁城縣學記

齊孝先

建元氏縣學記

曾宏

平山縣學記

武漸

問山堂記

金馮翼

重修唐縣學記

王若虛

正定府學記

周昂

大茂山總真洞修殿記

岳安常

重修贊皇縣學記

元王磐

史丞相祠記

王博文

重修元氏縣學記

王思廉

增修正定府學記

淮陰侯碑記

楊先韓

滹南王先生祠記

吳澄

趙文正公祠記

張曾

重修正定府學記

李本魯翀

滋溪書堂記

宋本

正定春風亭記

陳旅

修陽和樓記

楊俊民

記上

元氏白石神君祠記

漢失名

蓋聞經國序民莫急於禮禮有五經莫重於祭祭有二義或祈或報報以彰德祈以弭害古先哲王類帝禋宗望於山川徧於羣神建立兆域修設壇屏所以昭孝息民輯寧上下也茲白石神君居九山之數參三條之一兼將軍之號秉斧鉞之威體連封龍氣通北嶽幽贊天地長育萬物觸石而出膚寸而合不終朝而澍雨沾洽前後國縣屢有祈請詣日刻期應時有驗猶自提損不求禮秩縣界有六名山三公封

龍靈山先得法食光祚四年三公守民蓋高等始爲
無極山詣太常求法食相縣以白石神君道德灼然
乃具載始末上尚書求依無極爲比卽聽許於是遂
開拓舊地設立殿宇宮宇既定禮秩有常縣出經用
備共犧牲奉其珪璧潔其粢盛旨酒欣欣燔炙芬芬
敬恭明祀降福孔殷故天無伏陰地無蠱陽水無沉
氣火無炎燁時無逆數物無害生用能光遠宣朗顯
融昭明年穀歲熟百姓豐盈粟斗五錢國界安寧余
乃蒞景山歷崢嶸采元石勒功名其辭曰巖巖白石
峻極太清皓皓素質因體爲名淮山降神髦士挺生

濟濟俊乂朝野充盈災害不起百穀順成乃依無極
聖朝見聽遂興靈宮於山之陽營宇之制是度是量
卜云其吉終焉允臧匪奢匪儉率繇舊章華殿清閼
肅雍顯相元圖靈像穆穆皇皇四時禋祀不愆不忘
擇其令辰進其馨香犧牲玉帛黍稷稻粱神降嘉祉
萬壽無疆子子孫孫永永蕃昌

按神顯不經舊志載祠在元氏白石山麓善典雲雨
禱卽應漢時請於朝祀之典祭法所謂有功於民者
歟

平泉庄記

唐李德裕

經始平泉追先志也吾隨侍先太師忠懿公在外十四年上會稽探禹穴歷楚澤巫山遊沅湘望衡嶠先公每維舟清眺意有所感必凄然遐想屬目伊川嘗賦詩曰龍門南嶽盡伊原草樹人烟目所存屈指北州梨棗熟夢魂秋日到郊園吾心感是詩有退居伊洛之志前守金陵歸於龍門之西得喬居士故居天寶末避地遠遊穢爲荒榛首陽微岑尚有薇蕨首陽舊徑惟餘竹木吾乃剪荆蕪驅狐狸如主班生之宅漸成應叟之地又得江南珍木奇石列於庭際平生

素願於此足矣吾嘗以爲出處者貴得其道進退者不失乎時古來賢達多有遺恨至於元祖潛身於柱史柳惠養德於士師漢代邴曼官不過六百石終無辱殆杳難及也如越蠡激文牛以肥遯留侯托黃老以辭世亦其次焉范曄感蔡澤一言超然高謝鄧禹見功臣多敗委遠名勢又其次也矧如余者於蔡無衛足之智處鳩有不鳴之患雖有泉石杳無歸期留此林泉貽厥後代嚮吾平泉者非吾子孫也以平泉一木一石與人者非佳子弟也吾百年之後爲權勢所奪則以先人所命泣而告之此吾志也詩曰維桑

與梓必恭敬止言其父所植也昔周人之思召伯愛其所憇之樹近代薛令君於禁省中見先祖所遺之詩必泣然流涕汝曹可不慕之惟岸爲谷谷爲陵然後已焉可也

韓府君墓記

宋韓琦

琦閱家集正定主簿張度所撰四代祖鼓城府君墓
銘知曾祖令公於晉天福中葬府君於趙州贊皇縣
太平鄉之北馬村然值五代之亂天下以兵相戕賊
常趙並邊復有北馬之患子孫避地多故於歲時灑
掃薦奠益不能及歷祀既遠遂忘所在琦自塵祿仕
深惟祖考塋域之重極意崇葺而念府君之葬幸知
其州縣鄉里之名雖距今百有餘年苟得土人之耆
舊可倚者使周訪之則萬一可識茲志未遂不敢懈
心嘉祐三年冬偶故吏鄭嗣宗者自東川宰行服歸

趙過都請見問其所居則贊皇之外邑也問北馬則
曰所居之隣村也遂以府君墳墓託之嗣宗去不數
月馳來告曰北馬有古塚巍然里人至今呼爲韓評
事墓乃遣男忠彥與指揮使殿直李延慶同往視之
且使祭而告曰若非開隧視銘則無以取衆人之信
祭已開隧先是於邑告所以至日令尉偕至與夫近
村之老幼婦女環而觀之者數十人纔及墓則張度
所爲志銘馬門頽朽缺自外觀之壙中一皆安然無
所動壁之丹雘尚若新塗繪者忠彥卽出志石示於
衆驚呼嗟異令尉閱其文亦相與欣歡爲忠彥賀亟

具墨蠟傳其本置石於故處而實其隧中繚以垣墻
樹以松柏得嗣宗之甥彭昂者主守之葬百餘年矣
數世已忘其所在一旦求而得之復內外完固無少
犯者實吾先積慶之感舉世稀濶之事也石本比家
集舊文有少刪畧處蓋曾祖令公削其繁也舊文缺
六代七代祖之諱今皆得之謹錄而載於家集府君
志文之後俾子孫傳之知吾事奉祖宗之勤賢者必
能過吾勤而不肖者亦當師吾勤而自勉也

藁城縣學記

齊孝先

藁城爲正定大邑素號蕃庶獨文宣王廟隱邑之西
雜以民居背之基址侵削殆盡縣大夫祝公好經術
多治行始至邑顧其廟咸戚焉乃屬其僚佐而告之
曰仲尼道之本原也今廟設不嚴則視之者必慢易
慢易之心生教何自而入禮之陳也不備則行之者
必怠惰怠惰之容作衆何自而化乎予視孔子廟地
褊狹不足以行禮禮疎畧不足以化民將來文明之
地遷而修之可乎僉應曰善於是主簿羅君適道首
以萊園獻焉其地在縣治之南固文明之所也至於